

աման շինող կին գյուղում մի քանիսն էին անուն հանած լինում, որոնք և հրավիրվում էին ուրիշների տները: Դա համարվում էր իրենց շնորհքի հանդես մեծարանք: Մի բարձր պղնձե կամ նույնիսկ կավե աման շուռ տալով՝ նրա սոքի վրա այդ կինը ծեփում էր նախ ապագա ամանի հատակը և ապա վերցնելով կավ պատրաստող կնոջից մի կազմն՝ օղակաձև կպցնում էր այդ հատակին և հմտությամբ ձեռքով բարակացնում: Այդ առաջին օղակի վրա նա շարում էր հաջորդաբար երկրորդ, երրորդ և այլ օղակները, իրար կպցնելով, երկու թաթերով դրսից և ներսից սեղմելով, պատերը բարակացնելով և դեպի վեր քաշելով: Ամանին անհրաժեշտ կանոնավոր կլորություն տալու համար նա շարունակ պտտվում էր ամանի շուրջը և միշտ մատները թաթախելով ջրի մեջ և ամանի կողերին հույ տալով ներսից և դրսից՝ տալիս էր կողերին ցանկալի հաստություն ու ձև և մակերեսի ողորկություն, ըստ հարկավորության դիմելով հատուկ փայտիկի օժանդակության: Երբ ամանը վերջնականապես ձևավորվում էր, նա մի բարակ պարանով հատակը կտրում էր պատվանդանից և դնում չորանալու, բայց ոչ արևի տակ: Լավ չորացած ամանը՝ զետեղվում էր քօրօնի մեջ և թրծվում:

Փօրօնն էլ կինն էր շինում. միայն Գորիս քաղաքում դրա համար հրավիրվում էր բրուտը: Փօրօնի համար ավելի հաստ կազմէր էին գլորվում: Փօրօնի հատակը չէր շինվում: Աշխատողը կանգնած էր լինում հորի մեջ և կազմէր հարկ-հարկ օղակաձև շարում իրար վրա, երեսները հարթեցնում և կողերը վեր քաշում, առանց շտապելու, որպեսզի ստորին շարքերը բավական չորանան և կարողանան պահել վերը դասավորվող օղակների ծանրությունը, որոնց հաստությունը երբեմն հասնում էր 8—10 սմ: Երբ կողերը լավ չորանում էին, միայն այն ժամանակ մեջը վառում էին ուժեղ կրակ, որով և քօրօնը թրծվում էր հենց շինված տեղում:

Երբ տանն աման էր պատրաստվում կամ քօրօն, տան մանկական աշխարհի համար ուրախություն էր լինում, թե՛ նրանք իրանք և թե՛ մեծերը նրանց համար ծեփում էին խաղալիքներ՝ սուլիչներ, կճուճիկներ, խնոցյակներ, տիկնիկների գլուխներ... Այս ամենն էլ ամանների հետ միասին թրծվում էին քօրօնի մեջ:

Ձանգեզուրի պրոնտնէրի շախիսը՝ բրուտների դուրզը, սովորական ձևի էր լինում: Նա բաղկացած էր երկու անիվ սեղաններից, որոնք մի առանցքի վրա էին հաստատված և առանցքի մի ծայրով գետնի մեջ ցցված: Վերին սեղանը փոքր էր, ստորին սեղանը՝ մեծ՝ ոտներով պտտեցնելու համար: Բայց այստեղ շախիսը մեծ մասամբ տեղավորվում էր հորի մեջ, այնպես, որ աման ֆաշօլը նստում էր հորի պոռնիցի մոտ՝ գետնին: Գորիսի բրուտներն աշխատում էին քարայրերի մեջ. ոչ հեռու քրատակնէրից հողի մեջ շինված է նրանց փօռնը՝ փուռը, քուրան, որտեղ և էրմ ըն՝ այրում են ամանները: Հետզհետե նույն վարպետները սկսել էին շինել նաև ջրմուղի խողովակներ՝ միլէր:

Ձանգեզուրցի պրոնտնէր էլ, երբ նրան հարցնում էին շինած ամանների թիվը, ճիշտ չէր պատասխանում և աշխատում էր նրանց պաշտպանել շար աշքի ազդեցությունից:

### Փ Ա Յ Տ Ա Գ Ո Ր Ծ Ո Ւ Թ Յ Ո Ւ Ն

Կավեղեն ամանների հետ մրցում էին փայտից շինած ամանները՝ զանազան մեծության քսնանէր, խմորի և լվացքի տաշտերը, խնոցիկներ: Փայտից էին շինում գդալամանները, խօնչաներն և տէփօրիկներ, շերեփներն ու